

Waor of niet waor?

deur Dick van Bloemendaal

Hele kleine verhaoltsjes die soms warkeluk gebeur bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet waor bin.

Peerdegeld

Zo umstreeks negentientwientug van de veuruge eeuw was dur an zee in buurtschap Telgt un boerderie waor twee vriegezelle jonges mit dur ouwe moeder woenden. Naost un gewone vee-stapel han ze ok nog vier peerden, un hengst en drie merries. Mit ut wark op ut land han ze die peerden wel nodug in die kleiground. Ut gebeurde vaak dat dur drie vur de ploeg stungen um ut bouwland um te kriegen. De peerden mossen dur aordug an trekken um de ploeg deur die vette klei te kriegen. Bie één van de merries han ze un mooi vullinkje en nao lang gepraot hen ze besleuten um ut te verkopen, ze kossen toch ok nie alles anhouden. Toen bin de jonges dur mee naor de peerdemart in Zuudlaren e'gaon en hen ut, naor hun denken, aordug goed verkocht.

Toen ze weer thuis kwammen hen ze ut geld dat ze e'beurd hen bie moe in de zak van dur schulk e'goid'.

Dat was daor zo de gewoonte, al ut geld dat dur van de boerderie binnen kwam, ging via moe de kabinetskast in en laoter naor



de boereleenbank. Disse keer was dur wel iets besonders an ut geld, want ut minsje had ut niet, zo as aarst, effe nao e'teld en dan ope'burgen. Nei, ze had ut los in de zak van dur schulk laoten liggen en zo af en toe dur effe mit dur hand deurheen e'wreven. Un paor uur laoter zei ze: " Dit is toch heel aar geld as dat van de biggen die we vurrige week ofe'leverd hen, want peerdegeld is deftug geld". Ze het ut peerdegeld ok apart wege'brocht naor de bank en niet mit ut are geld wat ze e'beurd had van de biggen. Zou dur nog steeds zukke boeretrots bestaon, of is dat tegeswoordugs helemaol van de baon.

Bron: uut un boek van de Achterhoekse fietsemaker en schriever Gradus Geurtsen.

+++